

Parlamentario Marisol Lopez-Tromp (POR):

'A puntra riba maneho di enfermedadnan mental'

ORANJESTAD - **Con-**
trario na gobierno anterior,
actual gobierno mester
duna atencion na cuida
mental y atencion special
pa esunnan cu handicap
multiple.

Durante tratamiento di presupuesto di pais Aruba den parlamento, prome cu lider di fraccion di POR Marisol Lopez-Tromp a bay over na preguntanan na e ministernan presente. Sra. Lopez-Tromp a remarca cu e presupuesto cu ta wordo trata awo den luna di april mester a wordo entrega for di 1 di september aña pasa caba, pero cu esaki no a tuma luga. Esaki debi cu ex minister Angel Bermudez, den pleno campaña a dicidi cu no ta cumpli, cual tabata e inicio pa bin cu un tardansa asina grandi.

Despues di esaki el a haci diferente pregunta na e ministernan presente cu tabata Dangui Oduber(MEP), Glembert Croes(MEP) y Andin Bikker(POR). Prome preguntanan a wordo dirigi pa minister Dangui Oduber y a concentra hopi riba e aspecto di salud. A puntra riba maneho di enfermedadnan mental, cual despues di a reuni cu varios instancia concerniente cu for di e tema aki por a conclui, mescos cu

e area social, a wordo negligencia totalmente pa e gobierno anterior. Tabatin un ausencia di maneho, un ausencia di liderazgo, cual ta wordo sinti y mira na e banda di oposicion den parlamento.

Tin entendi cu na Sociaal Psychiatrische Dienst (SPD), pa menciona un di nan, tin como 550 pashent pa aña di cual 328 di nan tin problemanan psiquiatrico severo. Lamentablemente comunidad ta haya sa di esaki na momento cu hende wordo mata, of tin problema di crisis of sufrimento. Pero tin hopi cos ta keda scondi den nos comunidad. Teniendo na cuenta esaki, sra. Lopez-Tromp a puntra kico ta e estructura formal cu ta bay tin pa e parti di cuida medico mental, incluyendo tur instancianan relaciona cu e tema, manera entre otro respaldo.

Tambe kier haya sa, con esaki ta bay ta ocupa pa loke ta trata personal pa por atende e problema serio aki cu tin na Aruba. Otro pregunta ta relaciona cu intervencion di crisis, ora cu tin cu bay cerca hendenan mes, ora tin problemanan agudo psiquiatrico, psicosocial y tambe di adiccion cu mester di ayudo den menos cu 24 ora. Kico ta

wordo haci pa stimula e parti aki y con gobierno tin pensa di atende cu esaki, incluyendo e parti di personal.

Un punto importante cu sra. Lopez-Tromp a presenta, ta e echo cu hopi di nos hendenan cu ta bishita spoedeisende hulp ta critica cu nan ta sali sin un diagnostica. Pesey e ta puntra si esaki ta algo normal na otro paisnan of ta algo cu ta pasando na nos isla solamente. E parti di comunica tambe a haya atencion. A puntra si no lo ta miho pa ora dokternan di afo bin pa un periodo cortico, specialmente for di Hulanda, nan por comunica cu e pashentnan na un miho manera. Esaki specialmente pa hende grandi cu mester di atencion ya cu memey di nan dolor, nan mester purba comunica loke nan ta sinti den un idioma cu no ta esun di nan.

Esaki banda di e forma cu nan ta comunica cu e pashent of familiarnan. Igualmente el a menciona e parti di Centro di Cuido na San Nicolas cu ta keda na Palisaweg, unda tin un cantidad di camber bashi pa 8 aña largo durante gobierno di AVP, a pesar cu na varios ocasion a hasta roga pa haci uzo di nan. Ta trata aki di cambernan special pa esunnan cu handicap mul-



tiple. E ta un proyecto bunita pa nos grandi nan, pero tambe cu un area special pa esunnan cu limitacion severo. Y no ta solamente cambernan tin, pero tambe tin espacio pa duna terapia, tin piscina terapeutico y hasta cu schommel special pa esunnan cu tin un handicap. A presenta un mocion, pa percura pa esunnan cu handicap multiple por haci uzo di e centro aki, pa haya personal pa e personanan aki cu por haya e cuida y atencion 24 ora pa dia manera cu nan merece.

A pidi minister di Salud tambe pa apoya y reforsa e accionnan di control na restaurantnan rond di nos isla,

cual ta algo na bienestar di nos hendenan y nos bishitantenan. A puntra ki atencion gobierno lo bay duna na e personanan cu ta sufi di alzheimer y tambe pa nan famia, mirando cu e grupo aki ta creciente. Kico ta bay haci pa loke ta campaña di conscientisacion pa loke ta pushi y cachonan di caya. Si ta bay implementa e ley na un forma mas severo.

E ultimo pregunta pa sr. Oduber cu sra. Lopez-Tromp a haci ta: cual ta e pensamiento di gobierno pa loke ta e kill cage unda cachonan den mal, pero tambe den bon condicionnan ta caba eynan.